



列傳第三十八

北齊書四十六

隋太子通事舍人李百藥撰

循吏

張華原

宋世良

弟世軌

郎基

孟業

崔伯謙

蘇瓊

房豹

路去病

先王疆理天下司牧黎元刑法以禁其姦禮教以防其欲故分職命官共理天下書云知人則哲能官人安人則惠睿哲之君必致清明之臣昏亂之朝多有貪殘之吏高祖撥亂反正以卹隱爲懷故守令之徒才多稱職仍以戰功諸將出牧外藩不識治體無聞政術非唯暗於前言往行乃至始學依判付曹聚斂無厭淫虐不已雖或直繩終無悛革於戲此朝廷之大失太寧以後風雅俱缺賣官鬻獄上下相蒙降及末年黷貨滋甚齊氏循良如辛術之徒非一多以官爵通顯別有列傳如房仲幹之屬在武平之末能卓爾不羣斯固彌可嘉也今掇張華原等列於循吏云

張華原字國滿代郡人也少明敏有器度高祖開驃騎府引爲法曹參軍遷大丞相府屬仍侍左右從於信都深爲高祖所親待高祖每號令

三軍常令宣諭意旨周文帝始據雍州也高祖
猶欲以逆順曉之使華原入關說焉周文密有
拘留之意謂華原曰若能屈驥足於此當共享
富貴不爾命懸今日華原曰渤海王命世誕生
殆天所縱以明公葢爾關右便自隔絕故使華
原銜喻公旨明公不以此日改圖轉禍為福乃
欲賜脅有死而已周文嘉其亮正乃使東還高
祖以華原久而不返每歎惜之及聞其來喜見
於色累遷為兗州刺史人懷感附寇盜寢息州
獄先有囚千餘人華原皆決遣至年暮唯有重
罪者數十人華原亦遣歸家申賀依期至獄先
是州境數有猛獸為暴自華原臨州忽有六駮
食之咸以化感所致後卒官州人大小莫不號慕
宋世良字元友廣平人年十五便有膽氣應募
從軍北討屢有戰功尋為殿中侍御史詣河北
括戶大獲浮惰還見汲郡城旁多骸骨移書州
郡令采心收瘞其夜甘雨霽霽還孝莊勞之曰知
卿所括得丁倍於本帳若官人皆如此用心便

是更出一天下也出除清河太守世良才識閑
明尤善治術在郡未幾聲問甚高郡東南有曲
堤成公一姓阻而居之羣盜多萃於此人爲之
語曰寧度東吳會稽不歷成公曲堤世良施八
條之制盜奔他境民又謠曰曲堤雖險賊何益
但有宋公自屏跡後齊天祿中大赦郡先無一
囚羣吏拜詔而已獄內穉生桃樹蓬蒿亦滿每
日衙門虛寂無復訴訟者其父醴泉出於界內
及代至傾城祖道有老人丁金剛泣而前謝曰
已年九十記三十五政君非唯善治清亦徹底
今失賢君民何濟矣莫不攀援涕泣除東郡太
守卒官世良強學好屬文撰字略五篇宋氏別
錄十卷與弟世軌俱有孝友之譽

世軌幼自嚴整好法律稍遷廷尉卿洛州民聚
結欲劫河橋吏捕案之連諸元徒黨千七百人
崔暹爲廷尉以之爲反數年不斷及世軌爲少
卿判其事爲劫於是殺魁首餘從坐悉捨焉時
大理正蘇珍之亦以平幹知名寺中爲之語曰

決定嫌疑蘇珍之視表見裏宋世軌時人以為
寺中二絕南臺囚到廷尉世軌多雪之仍移攝
御史將問其濫狀中尉畢義我雲不送移往復不
止世軌遂上書極言義雲酷擅顯祖引見二人
親勅世軌曰我知臺欺寺久卿能執理與之抗
銜但守此心勿慮不富貴勅義雲曰卿比所為
誠合死以志在疾惡故且一恕仍顧謂朝臣曰
此二人並我骨鯁臣也及疾卒廷尉御史諸繫
囚聞世軌死皆哭曰宋廷尉死我等豈有生路

世良從子孝王學涉亦好緝綴文藻形貌短陋
而好臧否人物時論甚疾之為段孝言開府參
軍又薦為北平王文學求入文林館不遂因非
毀朝士撰別錄二十卷會平齊改為關東風俗
傳更廣見聞勒成三十卷以上之言多妄謬篇
第冗雜無著述體

郎基字世業中山人身長八尺美鬚髯汎涉墳
典尤長吏事起家奉朝請累遷海西鎮將梁吳
明徹率衆攻圍海西基獎勵兵民固守百餘日

軍糧且罄戎仗亦盡乃至削木爲箭前刀紙爲羽
圍解還朝僕射楊愔迎勞之曰卿本文吏遂有
武略削木剪紙皆無故事班墨之思何以相過
後帶潁川郡積年留滯數日之中剖判咸盡而
臺報下竝允基所陳條綱既踈獄訟清息官民
遐邇皆相慶悅基性清慎無所營求曾語人云
任官之所木枕亦不須作沉重於此事唯頗令
寫書潘子美我曾遺之書曰在官寫書亦是風流
罪過基答書曰觀過知仁斯亦可矣後卒官柩
將還遠近將送莫不攀轅悲哭

孟業字敬業鉅鹿安國人家本寒微少爲州吏
性廉謹同寮諸人侵盜官絹三十疋與之拒而
不受魏彭城王韶拜定州除典籤長史劉仁之
謂業曰我處其外君居其內同心戮力庶有濟
乎未幾仁之徵入爲中書令臨路啓韶云殿下
左右可信任者唯有孟業願專任之餘人不可
信也又與業別執手曰今我出都君便失援恐
君在後不日保全唯正與直願君自勉業唯有

一馬因瘦而死詔以業家貧令州府官人同食馬肉欲令厚償業固辭不敢詔乃戲業曰卿邀名人也對曰業以微細伏事節下既不能裨益寧可損敗清風後高祖書與詔云典籤姓孟者極能用心何不置之目前詔高祖之壻也仁之後爲兖州臨別謂吏部崔暹曰貴州人士唯有孟業宜銓舉之他人不可信也崔暹問業曰君往在定州有何政績使劉四亮如此欽歎答曰稟性愚直唯知自修無他天保初清河王岳拜司州牧聞業名行復召爲法曹業形兒短小及謂見岳心鄙其眇小笑而不言後尋業斷決之處乃謂業曰卿斷決之明可謂有過軀兒之用尋遷東郡守以寬惠著其年麥一莖五穗其餘三穗四穗共一莖合郡人以為政化所感尋以病卒崔伯謙字士遜博陵人父文業鉅鹿守伯謙少孤貧善養母高祖召赴晉陽補相府功曹稱之曰清直奉公具良佐也遷瀛州別駕世宗以為京畿司馬勞之曰卿騁足瀛部已著康歌督府

北齊列傳三十八
一十一
務殷是用相授族弟暹當時寵要謙與之寮舊
同門非吉凶未曾造請後除濟北太守恩信大
行乃改鞭用熟皮為之不忍見血示耻而已有
朝貴行過郡境問人太守治政何如對曰府君
恩化古者所無因誦民為歌曰崔府君能治政
易鞭鞭布威德民無爭客曰既稱恩化何由復
威曰長吏憚威民庶蒙惠徵赴鄴百姓號泣遮
道以第讓在關中不復居內任除南鉅鹿守事
無巨細必自親臨見民有貧弱未理者皆曰我自
有白鬚公不慮不決後為銀青光祿卒

蘇瓊字珍之武強人也父備仕魏至衛尉少卿
瓊幼時隨父在邊嘗謂東荊州刺史曹芝芝戲
問曰卿欲官否對曰設官求人非人求官芝異
其對署為府長流參軍文襄以儀同開府引為
刑獄參軍每加勉勞并州嘗有彊盜長流參軍
推其事所疑賊竝已拷伏失物家竝識認唯不
獲盜賊文襄付瓊更令窮審乃別推得元景融
等十餘人竝獲賊驗文襄大笑語前妾引賊者

曰爾輩若不遇我好參軍幾致枉死除瓊累遷
南清河太守其郡多盜及瓊至民吏肅然姦盜
止息或外境姦非輒從界中行過者無不捉送
零陵縣民魏雙成失牛疑其村人魏子賓送至
郡一經窮問知賓非盜者即便放之雙成訴云
府君放賊去百姓牛何處可得瓊不理密走私
訪別獲盜者從此畜牧不收多放散云但付府
君有鄰郡富豪將財物寄置界內曰我物已寄
蘇公矣賊遂去平原郡有妖賊劉黑狗結徒
信邇於滄海所部人連接村居無相染累鄰邑
於此伏其德郡中舊賊一百餘人悉充左右人
間善惡及長吏飲人一盃酒無不即知瓊性清
慎不發私書道人研為濟州沙門統資其產巨富
在郡多有出息常得郡縣為徵及欲求謁度知
其意每見則談問玄理應對肅敬研雖為債數
來無由啟口其弟子問其故研曰母見府君徑
將我入青雲間何由得論地上事郡民趙穎曾
為樂陵太守八十致事歸五月初得新瓜一雙

自來送穎恃年老苦請遂便爲留仍致於聽事
梁上竟不剖人遂競貢新果至門間知穎瓜猶
在相顧而去有百姓乙普明兄弟爭田積年不
斷各相援引乃至百人瓊召普明兄弟對眾人
諭之曰天下難得者兄弟易求者田地假令得
地失兄弟心如何因而下淚衆人莫不灑泣普
明弟兄叩頭乞外更思分異十年遂還同住每
年春揔集大儒衛顛隆田元鳳等講於郡學朝
吏文案之暇悉令受書時人指吏曹爲學士屋
禁斷淫祠婚姻喪葬皆教令儉而中禮又蠶月
預下綿絹度樣於部內其兵賦次第立立明式
至於調役事必先辨郡縣長吏常無十杖稽失
當時州郡無不遣人至境訪其政術天保中郡
界大水人災絕食者千餘家瓊普集部中有粟
家自從貨負粟以給付飢者非計戶徵租復欲推
其貸粟綱紀謂瓊曰雖矜饑餒恐罪累府君瓊
曰一身獲罪且活千室何所怨乎遂上表陳狀
使檢覈免人戶保安此等相撫兒子咸言府君

生汝在郡六年人庶懷之遂無一人經州前後
四表列為尤最遭憂解職故人贈遺一無所受
尋起為日直廷尉正朝士嗟其屈尚書辛述曰
既直且正名以定體不戀不申初瓊任清河太
守裴獻伯為濟州刺史酷於用法瓊恩於養人
房延祐為樂陵郡過州裴問其外聲祐去唯聞
太守善刺史惡裴去得民譽者非至公祐亦言
若爾黃霸龔遂君之罪人也後有勅州各舉清
能裴以前言恐為瓊陷瓊申其枉滯議者尚其

公平畢義雲為御史中丞以猛暴任職理官忌
憚莫敢有違瓊推察務在公平得雪者甚衆寺
署臺案始自於瓊遷三公郎中趙州及河南中
有人頻告謀反前後皆付瓊推檢事多申雪尚
書省崔昂謂瓊曰若欲立功名當更思餘理仍
數雪反逆身命何輕瓊正色曰所雪者怨枉不
放反逆昂大慙京師為之語曰斷決無疑蘇珩
之遷左丞行徐州事徐州城中五級寺忽被盜
銅像一百區有司徵檢四鄰防宿及蹤跡所疑

逮繫數十人瓊一時放遣寺僧怨訴不爲推賊
瓊遣僧謝曰但且還寺得像自送爾後十日抄
賊姓名及賊處所徑收掩悉獲實驗賊徒款引
道俗歎伏舊制以淮禁米聽商販輒度南淮歲
儉啓聽淮北取糴後北人饑請通糴淮南得商
估往還彼此兼濟水陸之利通於河北後爲大
理卿而齊亡仕周爲博陵太守

房豹字仲幹清河人祖法壽魏書有傳父翼宗
豹體貌魁岸美音儀釋褐府參軍兼行臺郎中
隨慕容紹宗紹宗自二公有水厄遂於戰艦中浴
并自投於水冀以厭當之豹曰夫命也在天豈
人理所能延促公若實有災眚恐非禳所能加
若其實無何禳之有紹宗笑曰不能免俗爲復
爾未幾而紹宗遇溺時論以爲知微遷樂陵太
守鎮以凝重哀矜貧弱豹階庭簡靜園囿空虛
郡治瀕海水味多鹹苦豹命鑿一井遂得甘泉
遐邇以爲政化所致豹罷歸後井味復鹹齊滅
還鄉園自養頻徵辭疾終於家

路去病陽平人也風神踈朗儀表瓌異釋褐開
府參軍勅用士人爲縣宰以去病爲定州饒陽
令去病明閑時務性頗嚴毅人不敢欺然至廉
平爲吏民歎服擢爲成安令京城下有鄴臨漳
成安三縣輦轂之下舊號難治重以政亂時難
網維不立功臣內戚請囑百端去病消息事宜
以理抗荅勢要之徒雖屬養小人莫不憚其風
格亦至嫌恨自遷鄴以還三縣令治術去病獨
爲稱首周武平齊重其能官與濟陰郡守公孫
冀氏縣令

景茂二人不被替代發詔褒揚隋大業中卒於

列傳第三十八

北齊書四十六

列傳第三十九

北齊書四十七

隋太子通事舍人李百藥撰

酷吏

邱瓛

宋遊道

盧斐

畢義雲

夫人之性靈稟受或異剛柔區別緩急相形未
有深察是非莫不肆其情欲至於詳觀水火更

佩韋絃者鮮矣獄吏爲患其所從來久矣自魏途不競網漏寰區高祖懲其寬怠頗亦威嚴馭物使內外羣官咸知禁網今錄邸珎等以存酷吏懲示勸勵云

邸珎字寶安本中山上曲陽人也從高祖起義拜爲長史性嚴暴求取無馱後兼尚書右僕射大行臺節度諸軍事珎御下殘酷衆士離心爲民所害後贈定州刺史

宋遊道廣平人其先自燉煌徙焉父季預爲勃海太守弱冠隨父在郡父亡吏人贈遺一無所受事母以孝聞與叔父別居叔父爲奴誣以逆遊道誘令返雪而殺之魏廣陽王深北伐請爲鎧曹及爲定州刺史又以爲府佐廣陽王爲葛榮所殺元徽誣其降賊收錄妻子遊道爲訴得釋與廣陽王子迎喪返葬中尉酈善長嘉其氣節引爲殿中侍御史臺中語曰見賊能討宋遊道孝莊即位除左中兵郎又爲尚書令臨淮王或譴責遊道乃執版長揖曰下官謝王瞋不謝

王理即日詣闕上書曰徐州刺史元孚頻有表云僞梁廣發士卒來圍彭城乞增羽林二千以孚宗室重臣告請應實所以量奏給武官千人孚令代下以路阻自防遂納在防羽林八百人辭云疆境無事乞特還家臣忝局司深知不可尚書令臨淮王或即孚之兄子遣省事謝遠三日之中八度逼迫云宜依判許臣不敢附下罔上孤負聖明但孚身在任乞師相繼及其代下便請放還進退爲身無憂國之意所請不合其罪下科或乃召臣於尚書都堂去卿一小郎憂國之心豈厚於我醜罵溢口不顧朝章右僕射臣世隆吏部郎中臣薛琚已下百餘人竝皆聞見臣實獻直言云臣奉國事在其心亦復何簡貴賤比自北海入洛王不能致身死難方清宮以迎暴賊鄭先護立義廣州王復建旗往討趨惡如流伐善何速今得冠冕百寮乃欲爲私害政爲臣比言或賜怒更甚臣既不佞干犯貴臣乞解郎中帝召見遊道嘉勞之或亦奏言臣忝冠

百寮遂使一郎攘袂高聲肆言頓挫乞解尚書
令帝乃下勅聽解臺郎後除司州中從事時將
還鄴會霖雨行旅擁於河橋遊道於幕下朝夕
宴歌行者曰何時節作此聲也固大癡後神武
自太原來朝見之曰此人宋遊道耶常聞其名
今日始識其面遷遊道別駕後日神武之司州
饗朝士舉觴屬遊道曰飲高歡手中酒者大文
夫卿之爲人合飲北酒及還晉陽百官辭於紫
陌神武執遊道手曰甚知朝貴中有憎己心卿者

但用心莫懷畏慮當使卿位與之相似於是啓
以遊道爲中尉文襄執請乃以吏部郎中崔暹
爲御史中尉以遊道爲尚書左丞文襄謂暹遊
道曰卿一人處南臺一人處北省當使天下肅
然遊道入省劾太師咸陽王坦太保孫騰司徒
高隆之司空侯景錄尚書元弼尚書令司馬子
如官賈金銀催徵酬價雖非拍事贓賄終是不
避權豪又奏駁尚書違失數百條省中豪吏王
儒之徒竝鞭斥之始依故事於尚書省立門名

以記山人早晚令僕已下皆側目魏安平王坐
事亡早武二王及諸王妃太妃是其近親者皆
被徵責都官郎中畢義雲主其事有奏而禁有
不奏輒禁者遊道判下廷尉科罪高隆之不同
於是反誣遊道厲色挫辱已遂枉考羣令吏證
成之與左僕射襄城王旭尚書鄭述祖等上言
曰飾僞亂真國法所必去附下同上王政所不
容謹案尚書左丞宋遊道名望本闕功績何紀
屬永安之始朝士亡散乏人之際叨竊臺郎躁
行譎言肆其奸詐罕識名義不顧典文人鄙其
心衆畏其口出州入省歷忝清資而長惡不悛
曾無忌諱毀譽由已憎惡任情比因安平王事
遂肆其褊心因報隙與郎中畢義雲遞相糺舉
又左外兵郎中魏叔道牒云局內降人左澤等
爲京畿送省令取保放出大將軍在省日判聽
遊道發怒曰往日官府何物官府將此例又云
乘前旨格成何物旨格依事請問遊道並旨承
引案律對捍詔使無人臣之禮大不敬者死對

得使者尚得死坐況遊道吐不臣之言犯慢上之罪口稱夷齊心懷盜跖欺公賣法受納苞苴產隨官厚財與位積雖贓污未露而姦詐如是舉此一隅餘詐可驗今依禮據律處遊道死罪是時朝士皆分爲遊道不濟而文襄聞其與隆之相抗之言謂楊遵彥曰此真是鯁直大剛惡人遵彥曰譬之畜狗本取其吠今以數吠殺之恐將來無復吠狗詔付廷尉遊道坐除名文襄使元景康謂曰卿早逐我向并州不爾他經略殺卿遊道從至晉陽以爲大行臺吏部又以爲太原公開府諮議及平陽公爲中尉遊道以諮議領書侍御史尋以本官兼司徒左長史及文襄疑黃門郎溫子昇知元瑾之謀繫之獄而餓之食敝襦而死弃屍路隅遊道收而葬之文襄謂曰吾近書與京師諸貴論及朝士卿僻於朋黨將爲一病今卿真是重舊節義人此情不可奪子昇吾本不殺之卿葬之何所憚天下人代卿怖者是不知吾心也尋除御史中尉東萊王道

習參御史選限外投狀道習與遊道有舊使令
史受之文襄怒杖遊道而判之曰遊道直稟性道
悍是非肆口吹毛洗垢瘡痍人物往與郎中蘭
景雲忿競列事十條及加推窮便是虛妄及兵
道習凌侮朝典法官而犯特是難原宜付省科
遊道被禁獄吏欲為脫枷遊道不肯曰此令命
所着不可輒脫文襄聞而免之遊道抗志不改
天保元年以遊道兼太府卿乃於少府覆檢主
司盜截得鉅萬計奸吏返誣奏之下獄尋得出

不歸家徑之府理事卒遣令薄葬不立碑表不
求贈謚贈爪州刺史武平中以子士素久典機
密重贈儀同三司謚曰貞惠遊道剛直疾惡如
讎見人犯罪皆欲致之極法彈糾見事又好察
陰私問獄察情捶撻嚴酷兖州刺史李子貞在
州貪暴遊道案之文襄以貞預建義勲意將含
忍遊道疑陳元康為其內密啓云子貞元康交
遊恐其別有請囑文襄怒於尚書都堂集百寮
撲殺子貞又兖州人為遊道生立祠堂焉題曰

忠清君遊道別劾吉寧等五人同死有欣悅色
朝士甚鄙之然董交遊存然諾之分歷官嚴整
而時大納賄分及親故之艱匱者其男女孤弱
為嫁娶之臨喪必哀躬親襄事為司州綱紀與
牧樂昌河西二王乖忤及二王薨每事經恤之
與頓丘李獎一面便定死交獎曰我年位已高
會用弟為佐史令弟北面於我足矣遊道曰不
能既而獎為河南尹辟遊道為中正使者相屬
以衣帽待之握手歡謔元顥入洛將受其命出
使徐州都督元孚與城人趙紹兵殺之遊道為
獎訟寃得雪又表為請贈迴已考一切階以益
之又與尉廡結交託廡弟粹於徐州趙紹後
平之梟粹首於鄴市孫騰使客告市司得錢五
百萬後聽收遊道時為司州中從事令家人作
尉粹所親於州陳訴依律判許而奏之勅至市
司猶不許遊道杖市司勒使速付騰聞大怒時
李獎二子構訓居貧遊道後令其求三富人死
事判免之凡得錢百五十萬盡以入構訓其使

氣黨袂如此時人語曰遊道獼猴面陸操科斗
形意識不關貌何謂醜者必無情構嘗因遊道
會客因戲之曰賢從在門外大好人宜自迎接
為通名稱族弟遊山遊道出見之乃獼猴衣帽
也將與構謝之豁然如舊遊道死後構為定州
長史遊道第三子士遜為墨曹博陵王管記與
曲籤共誣奏構構於禁所祭遊道而訴焉士遜
書卧如夢者見遊道怒已曰我與構恩義汝豈
不知何共小人謀陷清直之士士遜驚跪曰不
敢不敢旬日而卒遊道每戒其子屯蹇性自如
此子孫不足以師之諸子奉父言柔和謙遜士
素沉密少言有才識中書黃門侍郎遷儀同三
司散騎常侍常領黃門侍郎自處機要近二十
年周慎温恭甚為彥深所重初祖珽知朝政出
彥深為刺史珽奏以士素為東都中侍郎李德
林白珽留之由是還除黃門侍郎共叅機密士
約亦為善士官尚書左丞

盧斐字子章范陽涿人也父周魏殿中尚書斐

性殘忍以強斷知名世宗引為相府刑獄參軍
謂之去狂簡斐然成章非佳名字天保中稍遷
尚書左丞別典京畿詔獄酷濫非人情所為無
問事之大小拷掠過度於大棒車輻下死者非
一或嚴冬至寒置囚於冰雪之上或盛夏酷熱
暴之日下枉陷人致死者前後百數又伺察官
人罪失動即奏聞朝士見之莫不重跡屏氣皆
目之為盧校書斐後以謗史與李庶俱病鞭死
獄中

畢義雲小字陀兒少麤俠家在兗州北境常劫
掠行旅州里患之晚方折節從官累遷尚書都
官郎中性嚴酷事多幹了齊文襄作相以為稱
職令普勾偽官專以車輻考掠所獲甚多然大
起怨謗曾為司州吏所訟云其所減截并改換
文書文襄以其推偽衆人怨望竝無所問乃拘
吏數人而斬之因此銳情訊鞠威名日盛文宣
受禪除治書侍御史彈射不避勳親累遷御史
中丞繩劾更切然豪橫不平頻被怨訟前為汲

郡太守崔嵩高啓列義雲從父兄僧明負官債先任京畿長吏不受其屬立限切徵由此挾嫌數遣御史過郡訪察欲相推繩又坐私藏工匠家有十餘機織錦并造金銀器物乃被禁止尋見釋以爲司徒左長史尚書左丞司馬子瑞奏彈義雲稱天保元年四月竇氏皇后姨祖載日內外百官赴第吊省義雲唯遣御史投名身遂不赴又義雲啓云喪婦孤貧後娶季世安女爲妻世安身雖父服未終其女爲祖已就平吉特乞

闇迎不敢備禮及義雲成婚之夕衆儲備設尅日拜閭鳴騶清路盛列羽儀兼差臺吏二十人責其鮮服侍從車後直是苟求成婚誣罔于上義雲資產宅宇足稱家室忽道孤貧亦爲矯詐法官如此直繩焉寄又駕幸晉陽都坐判拜起居表四品五品已上令預前一日赴南都署表三品已上臨日署訖義雲乃乖例署表之日索表就家先署臨日遂稱私忌不來於是詔付廷尉科罪尋勅免推子瑞又奏彈義雲事十餘條

多煩碎罪止罰金不至除免子瑞從兄消難為
北豫州刺史義雲遣御史張子階詣州采風聞
先禁其典籤家客等消難危懼遂叛入周時論
歸罪義雲云其覆執子瑞事亦上聞爾前譙賞
義雲常預從此後集見稍踈聲望大損乾明初
子瑞遷御史中丞鄭子默正被任用義雲之姑
即子默祖母遂除度支尚書攝左丞子默誅後
左丞便解孝昭赴晉陽高元海留鄴義雲深相
依附知其信向釋氏常隨之聽講為此款密相

所不至及孝昭大漸顧命武成高歸彥至都武
成猶致疑惑元海遣犢車迎義雲入北宮參審
遂與元海等勸進仍從幸晉陽參預時政尋除
兖州刺史給後部鼓吹即起本州軒昂自得意
望銓衡之舉見諸人自陳逆許引接又言離別
暫時非久在州先有饒吹至於案部行遊遂兩
部竝用猶作書與元海論叙時事元海入內不
覺遺落給事中李孝貞得而奏之為此元海漸
踈孝貞因是兼中書舍人又高歸彥起逆義雲

在州私集人馬并聚甲仗將以自防實無他意
爲人所啓及歸彥被擒又列其朋黨專擅爲此
追還武成猶錄其往誠竟不加罪除兼七兵尚
書義雲性豪縱頗以施惠爲心累世本州刺史
家富於財士之匱乏者多有拯濟及貴恣情驕
侈營造第宅宏壯未幾而成閨門穢雜聲遍朝
野爲郎與左丞宋遊道因公事忿競遊道廷辱
之去雄狐之詩千載爲汝義雲一無所荅然酷
暴殘忍非人理所及爲家尤甚子孫僕隸常瘡
痍被體有孽子善昭性至凶頑與義雲侍婢奸
通擄掠無數爲其着籠頭繫之庭樹食以芻秣
十餘日乃釋之夜中義雲被賊害即善昭所佩
刀也遺之於善昭庭中善昭聞難奔哭家人得
舍人蘭子暢就宅推之爾前義雲新納少室范
陽盧氏有色兒子暢疑盧奸人所爲將加拷掠
盧具列善昭云爾乃收捕繫臨漳獄將斬之邢
邵上言此乃大逆義雲又是朝貴不可發乃斬

之於獄弃屍漳水

列傳第三十九

北齊書四十七

列傳第四十

北齊書四十八

外戚

趙猛

婁叡

尔朱文暢

鄭仲禮

李祖昇

元蠻

隋太子通事舍人李

百藥撰

胡長仁

自兩漢以來外戚之家罕有全者其傾覆之跡
逆亂之機皆詳諸前史齊氏后妃之族多自保
全唯胡長仁以譖訴貽禍斛律光以地勢被戮俱
非女謁盛衰之所致也今依前代史官述外戚
云爾

趙猛太安狄那人姊爲文穆皇帝繼室生趙郡
公琛猛性方直頗有器幹高祖舉義遷南營州
刺史卒

婁叡字佛仁武明皇后兄子也父壯魏南部尚
書叡少好弓馬有武幹爲高祖帳內都督從破
爾朱於韓陵累遷開府儀同驃騎大將軍叡無
器幹唯以外戚貴幸而縱情財色爲時論所鄙
皇建初封東安王高歸彥反於冀州詔叡往平
之還拜司徒公周兵寇東關叡率軍赴援頻戰
有功擒周將楊擗等進大司馬出摠偏師赴懸
瓠叡在豫境留停百餘日侵削官私專行非法
坐免官尋授太尉薨

尔朱文暢榮第四子也初封昌樂王其姊魏孝
莊皇后及四胡敗滅高祖納之待其家甚厚文
暢由是拜肆州刺史家富於財招致賓客既藉
門地窮極豪侈與丞相司馬任胄主簿李世林
都督鄭仲禮房子建等深相愛狎外示杯酒之
交而潛謀逆亂自魏氏舊俗以正月十五日夜
爲打竹簇之戲有能中者即時賞帛任胄令仲
禮藏刀於袴中因高祖臨觀謀爲竊發事捷
之後共奉文暢爲主爲任氏家客薛季孝告高
祖問皆具伏以其八姊寵故止坐文暢一房弟文
略以兄文羅卒無子後龍襄梁王以兄文暢事當從
坐高祖特寬貸文略聰明雋爽多所通習世宗
嘗令音水興於馬上彈胡琵琶奏十餘曲試使
文略寫之遂得其八世宗戲之曰聰明人多不
老壽梁郡其慎之文略對曰命之脩短皆在明
公世宗愴然曰此不足慮也初高祖遺令恕文
略十死恃此益橫多所凌忽平秦王有七百里
馬文略敵以好婢賂而取之明日平秦使文略

彈琵琶吹橫笛謠詠倦極使卧唱挽歌居數月
奪防者弓矢以射人曰不然天子不憶我有司
奏之伏法文略嘗大遺魏收請爲其父作佳傳
收論尔朱榮比韓彭伊霍蓋由是也

鄭仲禮滎陽開封人魏鴻臚嚴庶子也少輕險
有膂力高祖嬖寵其姊以親戚被昵擢帳內都
督嘗執高祖弓刀出入隨從任胄爲好酒不憂
公事高祖責之胄懼謀爲逆賴武明婁后爲請
故仲禮死不及其家

李祖昇趙國平棘人顯祖李皇后之長兄父希
宗上黨守祖昇儀容瓌麗垂手過膝睦姻好施
文學足以自通仕至齊州刺史爲徒兵所害弟
祖勳顯祖受禪除祕書丞及女爲濟南王妃除
侍中封丹陽王濟南廢爲北州刺史祖勳性貪
慢兼妻崔氏驕豪干政時論鄙之以數坐贓免
官無才幹自少及長居官皆因寵無可稱述卒
元壘魏太師江陽王繼子肅元壘后之父也歷
光祿卿天保十年大誅元氏肅元爲壘苦請因

是追原之賜姓步六孤氏尋病卒

胡長仁字孝隆安定臨涇人武成皇后之兄父
延之魏中書令長仁累遷右僕射及尚書令世
祖崩預參朝政封龐東王左丞鄒孝裕郎中陸
仁惠盧元亮厚相結託長仁每上省孝裕必方
駕而來省務既繁簿案堆積令史欲諮都座目
有百數孝裕屏人私話朝退亦相隨仁惠元亮
又伺間而往停斷公事時人號爲三佞長仁私
遊密席處處追尋孝裕勸其求進和士開深疾
之於是奏除孝裕爲章武守元亮等皆出孝裕
又說長仁曰王陽卧疾士開必來因而殺之入
見太后不過百日失官便代其處士開知其謀
徙孝裕爲北營建德守後長仁倚親驕豪無畏
憚士開出爲齊州長仁怨憤謀令刺士開事覺
遂賜死尋而後主納長仁女爲后重加贈謚長
仁弟等前後七人竝賜王爵合門貴盛從祖兄
長粲父僧敬即魏孝靜帝之舅位至司空長粲
少而敏悟以外戚起家給事中郎黃門侍郎後

主踐祚長粲被勅與黃門馮子琮出入禁中專
典敷奏世祖崩與領軍婁定遠錄尚書趙彥深
和士開高文遙領軍綦連猛高阿那肱僕射唐
邕同知朝政時人號爲八貴於後定遠文遙竝
出唐邕專典外兵綦連猛高阿那肱別擢武任長
粲常在左右兼宣詔令從幸晉陽後主即位富
於春秋庶事皆歸委長粲長粲盡心毗奉甚得名
譽又爲侍中長仁心欲入處機要之地爲執政不
許長仁疑長粲通謀大以爲恨遂言於太后發
其陰私請出爲州後主不得已從焉除趙州刺
史及辭長粲流涕後主亦憫默至州因沐髮手
不得舉失音卒

列傳第四十

北齊書四十八

列傳第四十一

北齊書四十九

方伎

隋太子通事舍人李百藥撰

由吾道榮

王春

信都芳

宋景業

許遵

吳遵世

趙輔和

皇甫玉

解法選

魏寧

綦母懷文

張子信

馬嗣明

易曰定天下之吉凶成天下之亶亶莫善於著龜是故天生神物聖人則之又神農桐君論本

草藥性黃帝歧伯說病候治方皆聖人之所重也故太史公著龜策日者及扁鵲倉公傳皆所以廣其聞見昭示後昆齊氏作霸以來招引英俊但有藝能無不畢策今竝錄之以備方伎云由吾道榮琅邪人少好道法與其同類相求入長太山潛隱具聞道術仍遊鄒魯之間習儒業晉陽人某大明法術乃尋是人為其家庸力無識之者久乃訪知其人道家符水呪禁陰陽歷數天文藥性無不通解以道榮好尚乃悉授之

是人謂道榮去我本恒岳僊人有少罪過為大
官所謫今限滿將歸卿宜送吾至汾水及河值
水暴長橋壞舡渡艱難是人乃臨水禹步以一
符投水中流便絕俄頃水積將至天是人徐自
沙石上渡唯道榮見其如是傍人咸云水如此
長此人遂能浮過共驚異之道榮仍歸本部隱
於琅邪山辟穀餌松木茯苓求長生之祕尋為
顯祖追往晉陽至遼山中有猛獸去馬十步所
追人驚怖將走道榮以杖畫地成火坑猛獸遽
走俄值國廢道榮歸周隋初乃卒又有張遠
者顯祖時令與諸術士合九轉金丹及成顯祖
置之玉匣云我貪世間作樂不能即飛上天待
臨死時取服

王春河東人少好易占明風角遊於趙魏之間
飛符上天高祖起於信都引為館客韓陵之戰
四面受敵從寅至午三合三離高祖將退軍春
叩馬諫曰比未時必當大捷遽縛其子詣王為
質不勝請斬之俄而賊大敗其後每征討其言

多中位徐州刺史卒

信都芳河間人少明筭術爲州里所稱有巧思
每精研究忘寢與食或墜坑坎嘗語人云筭之
妙機巧精微我每每沉思不聞雷霆之聲也
其用心如此以術數干高祖爲館客授參軍丞
相倉曹祖珽謂芳曰律管吹灰術甚微妙絕來
旣久吾思所不至卿試思之芳遂留意十數日
便云吾得之矣然終須河內葭莩灰後得河內
葭莩用其術應節便飛餘灰即不動也不爲時
所重竟不行故此法遂絕至又撰次古來渾
天地動靜器漏刻諸巧事并畫圖名曰哭器準又
著樂書遁甲經四術周斛宗芳又私撰歷書名
爲靈憲歷筭月有頻大頻小食必以朔證據甚
甄明每云何承天亦爲此法不能精靈憲若成
必當百代無異議書未就而卒

宋景業廣宗人明周易爲陰陽緯候之學兼明
歷數魏末任北平守顯祖作相在晉陽景業因
高德政上言易稽覽圖曰鼎五月聖人君天與

延年齒東北水中庶人王高得之謹案東北水
謂渤海也高得之明高氏得天下也是時魏武
定八年五月也高德政徐之才並勸顯祖應天
受禪乃之鄴至平城都諸大臣沮計將還賀拔
仁等又云景業誤王宜斬之以謝天下顯祖曰
景業當為帝王師何可殺也還至并顯祖令景
業筮遇乾之鼎景業曰乾為君天也易曰時乘
六龍以御天鼎五月卦也宜以仲夏吉辰御天
受禪或曰陰陽書五月不可入官犯之卒於其
位景業曰此乃大吉王為天子無復下期豈得
不終於其位顯祖大悅天保初授散騎侍郎又
有荆次德有術數預知尔朱榮成敗又言代魏
者齊葛榮聞之故自號齊王待次德以殊禮問
其天人之事對曰齊當興東海出天子今王據
渤海是齊地又太白與月并宜速用兵遲則不
吉榮不從也

許遵高陽人明易善筮兼曉天文風角占相逆
刺其驗若神高祖引為館客自言祿命不富貴

不橫死是以任性疏誕多所犯忤高祖常容惜之邛陰之役遵謂李業興曰彼爲火陣我木陣火勝木我必敗果如其言清河王岳以遵爲開府田曹記室岳封王以告遵遵曰蜜蜂亦作王岳後將救江陵遵曰此行致後凶宜辭疾勿去岳曰勢不免去正當與君同行遵曰好與生人相隨不欲共死人同路還岳至京尋喪顯祖無道曰甚遵語人曰多折筭來吾筮此狂夫何時當死遂布筭蒲床大言曰不出歲初我乃不見顯祖以十月崩遵果以九月死

吳遵世字季緒渤海人少學易入恒山從隱居道士遊處數年忽見一老翁謂之去授君開心符遵世跪取吞之遂明占候後出遊京洛以易筮知名魏武帝之將即位也使遵世筮之遇明夷之賁曰初登于天後入于地帝曰何謂也遵世曰初登于天當作天子後入于地不得久也終如其言世祖以丞相在京師居守自致猜疑甚懷憂懼謀將起兵每宿著令遵世筮之遵世

云不須起動自有大慶俄而趙郡王奉太后令以遺詔追世祖及即祚授其中書舍人固辭疾趙輔和清都人少以明易善筮爲館客高祖崩於晉陽葬有日矣世宗書令顯祖親卜宅兆相於鄴西北漳水北原顯祖與吳遵世擇地頻卜不言又至一所命遵世筮之遇革遵世等數十人咸云不可用輔和少年在衆人之後進云革卦於天下人皆凶唯王家用之大吉革彖辭云湯武革命應天順民顯祖遽登車顧云即以此地爲定即義平陵也有一人父疾是人詣館別託相知者筮之遇泰筮者云此卦甚吉是疾愈是人喜出後和謂筮者云泰卦乾下坤上然則入土矣豈得言吉果以凶問至和太寧武平中筮後宮誕男女及時日多中遂授通直常侍皇甫玉不知何許人善相人常遊王侯家世宗自潁川振旅而還顯祖從後玉於道旁縱觀謂人曰大將軍不作物會是道北垂鼻涕者顯祖旣即位試玉相術故以帛巾抹其眼而使歷摸

諸人至於顯祖曰此是最大達官於任城王曰
當至丞相於常山長廣二王並亦貴而各私搢
之至石動桶曰此弄癡人至供膳曰止得好飲
食而已王嘗為高歸彥相曰位極人臣但莫反
歸彥曰我何為反王曰不然公有反骨王謂其
妻曰殿上者不過二年妻以告舍人斛斯慶慶
以啓帝帝怒乃召之王每照鏡自言當兵死及被
召謂其妻曰我今去不還若得過日午時或當
得活既至正中遂斬之世宗時有吳士雙盲而
妙於聲相世宗歷試之聞劉桃枝之聲曰有所
繫屬然當大富貴至侯將相多死其手譬如鷹
犬為人所使聞趙道德之聲曰亦繫屬人富貴
翕赫不及前人聞太原公之聲曰當為人主聞
世宗之聲不動崔暹私搢之乃謬言亦國主也
世宗以為我羣奴猶當極貴况吾身也
解法選河內人少明相術鑒照人物皆如其言
頻為和士開相中士開牒為府參軍
魏寧鉅鹿人以善推祿命徵為館客武成親試

之皆中乃以己生年月託爲異人而問之寧曰
極富貴今年入墓武成驚曰是我寧變辭曰若
帝王自有法又有陽子術語人曰謠言盧十六
稚十四捷子拍頭三十二且四八天之大數大
上之祚恐不過此旣而武成崩年三十二也

其系母懷文不知何郡人以道術事高祖武定初
官軍與周文戰於邙山是時官軍旗幟盡赤西
軍盡黑懷文言於高祖曰赤火色黑水色水能
滅火不宜以赤對黑土勝水宜改爲黃高祖遂

改爲赭黃所謂河陽幡者又造宿鐵精以重柔
銚數宿則成剛以柔鐵爲刀脊浴以五牲之溺
淬以五牲之脂斬甲過三十札今襄國治家所
鑄宿柔銚乃其遺法作刀猶甚快利不能截三
十札也懷文去廣平郡南幹子城是干將鑄劍
處其土可以瑩刀懷文官至信州刺史又有孫
正言謂人曰我昔武定中爲廣州士曹聞城人
曹普演言高王諸兒阿保當爲天子至高德之
承之當滅阿保謂天保德之謂德昌也滅年號

承光即承之也

張子信河內人也性清淨頗涉文學少以醫術知名恒隱於白鹿山時遊京邑甚爲魏收崔季舒等所禮有贈荅子信詩數篇後魏以太中大夫徵之聽其時還山不常在鄴又善易卜風角武衛奚永洛與子信對坐有鵲鳴於庭樹聞而墮焉子信曰鵲言不善向夕若有風從西南來歷此樹拂堂角則有口舌事今夜有人喚必不得往雖勅亦以病辭子信去後果有風如其言是夜琅邪王五使切召永洛且云勅喚來洛欲起其妻苦留之稱墜馬腰折詰朝而難作子信齊亡卒

馬嗣明河內人少明醫術博綜經方甲乙素問明堂本草莫不咸誦爲人詠候一年前知其生死邢邵子患傷寒嗣明爲此詠候脉退告楊愔云邢公子傷寒不治自差然脉候不出一年便死覺之晚不可治邢竝侍讌內殿顯祖云子才兒我欲乞其隨近一郡勿以以子年少未合剖

符譙罷能奏云馬嗣明稱大寶賈脉惡一年內恐死
若其出郡醫曹藥難求遂寢大寶末其脊而卒楊令
患背腫嗣明以練石塗之便差作練石法以麤
黃色石鵝鴨卵大猛火燒令赤內溲醋中自屑
頻燒至石盡取石屑曝乾擣下筵和醋以塗腫
上無不愈後通直散騎常侍針灸孔穴往往與
明堂不同從駕往晉陽至遼陽山中數處見榜
云有人家女病若有能治差者購錢十萬諸名
醫多尋榜至問病狀不下手唯嗣明獨治之其
病由云曾以手將一麥穗即見一赤物長二寸
似蛇入其手指中因驚怖倒地即覺手臂疼重
漸及半身俱腫痛不可忍呻吟晝夜不絕嗣明
為處方服湯比嗣明從駕還女平復嗣明隋初卒

列傳第四十一

北齊書四十九

列傳第四十二

北齊書五十

隋太子通事舍人李百藥撰

恩倖

郭秀

和士開

穆提婆

高阿那肱

韓鳳

韓寶業

甚哉齊末之嬖幸也蓋書契以降未之有焉心
利錐刀居台鼎之任智昏救麥當機衡之重刑
殘闔宮蒼頭盧兒西域醜胡龜茲雜伎封王者
接武開府者比肩非直獨守弄臣且復多干朝
政賜予之費帑藏以虛杼軸之資剝掠將盡縱
龜鼎之祚卜世靈長屬此淫昏無不亡之理齊
運短促固其宜哉高祖世宗情存庶政文武任
寄多貞幹之臣唯郭秀少人有累明德天保五
年之後雖罔念作狂所去之徒唯左右驅馳內

外褻狎其朝廷之事一不與聞太寧之後姦倖
浸繁成業鴻基以之顛覆全民免夫被髮左衽
非不幸也今緝諸凶族爲佞幸傳云其宦者之
徒尤是亡齊之一物醜聲穢跡千端萬緒其事
闕而不書仍略存姓名附之此傳之末其帝家
諸奴及胡人樂工叨竊貴幸今亦出焉

郭秀范陽涿郡人事高祖爲行臺右丞親寵日
隆多受賂遺秀遇疾高祖親臨視之問所欲官
乃啓爲七兵尚書除未至而卒家無成人子弟

高祖自至其宅親使錄知其家資粟帛多少然後去命其子孝義與太原公已下同學讀書初秀忌揚悖誑脅令其逃亡秀死後悖還高祖追忿秀即日斥孝義終身不齒

和士開字彥通清都臨漳人也其先西域商胡本姓素和氏父安恭敏善人稍遷中書舍人魏孝靖嘗夜中與朝賢講集命安看斗柄所指安荅曰臣不識北斗高祖聞之以為淳直後為儀州刺史士開幼而聰惠選為國子學生解悟捷

疾為同業所尚天保初世祖封長廣王辟士開府行參軍世祖性好握槊士開善於此戲由是遂有斯舉加以傾巧便僻又能彈胡琵琶因此親狎嘗謂王曰殿下非天人也天帝也王曰卿非世人也是世神也其深相愛如此顯祖知其輕薄不令王與小人相親善責其戲狎過度徙長城後除京畿士曹參軍長廣王請之也世祖踐祚累除侍中加開府遭母劉氏憂帝聞而悲怨遣武衛將軍呂芬詣宅晝夜扶持成服後

方還其日帝又遣以犢車迎士開入內帝見親
自握手愴惻下泣曉喻良久然後遣還并諸弟
四人竝起復本官其見親重如此除右僕射帝
先患氣因飲輒大發動士開每諫不從屬帝氣
疾發又欲飲士開淚下獻歎不能言帝曰卿此
是不言之諫因不復飲言辭容止極諸鄙褻以
夜繼晷無復君臣之禮至說世祖云自古帝王
盡為灰燼堯舜桀紂竟復何異陛下宜及少壯
恣意作樂縱橫行之即是一日快活敵千年國

事分付大臣何慮不辦無為自勤苦也世祖大
悅其年十二月世祖寢疾於乾壽殿士開入侍
醫曹藥世祖謂士開有伊霍之才殷勤屬以後事
臨崩握士開之手曰勿負我也仍絕於士開之
手後主以世祖顧託深委仗之又先得幸於胡
太后是以彌見親密趙郡王叡與婁定遠等謀
出土開引諸貴人共為計策屬太后觴朝貴於
前殿戲面陳士開罪失云士開先帝弄臣城狐
社鼠受納貨賄穢亂宮掖臣等義無杜口冒死

以陳太后曰先帝在時王等何不道今日欲欺
孤寡耶但飲酒勿多言獻詞色愈厲或曰不出
士開朝野不定獻等或投冠於地或拂衣而起
言詞咆勃無所不至明日獻等共詣雲龍門令
文遙入奏之太后不聽段韶胡長粲傳言太后
曰梓宮在殯事大忽速欲王等更思量趙郡王
等遂立拜謝更無餘言太后及後主召見問士
開曰先帝羣官之中待臣最重陛下諒闇始爾
大臣皆有覬覦心若出臣正若剪陛下羽翼異宜

謂獻等云令士開爲州待過山陵然後發遣獻
等謂臣真出必心喜之後主及太后然之告獻
等如士開旨以士開爲兗州刺史山陵畢獻等
促士開就路士開載美女珠簾及條諸寶翫以
詣定遠謝曰諸貴欲殺士開蒙王特賜性命用
作方伯今欲奉別謹具上二女子一珠簾定遠
喜謂士開曰欲得還入不士開曰在內久常不
自安今得出實稱本意不願更入但乞王保護
長作大州刺史今日遠出願得一辭覲二宮定

遠許之士開由是得見太后及後主進說曰先帝一旦登遐臣媿不能自死觀朝貴勢欲以陛下謂乾明臣出之後必有大變復何面見先帝於地下因慟哭帝后皆泣問計將安出土開曰臣已得入復何所慮正須數行詔書耳於是詔出定遠青州刺史責趙郡王叡以不臣之罪召入而殺之復除士開侍中右僕射定遠歸士開所遺加以餘珍賂之武平元年封淮陽王除尚書令錄尚書事復本官是得如故世祖時恒令士開與太后握槊又出入卧內無復期依遂與太后爲亂及世祖崩後彌自放恣琅耶王儼惡之與領軍庫狄伏連侍中馮子琮御史王子宜武衛高舍洛等謀誅之伏連發京畿軍士帖神武千秋門外并私約束不聽士開入殿其年七月二十五日旦士開依式早參伏連前把士開手曰今有一大好事王子宜便授一函云有勅令王向臺遣兵士防送禁於治事廳事儼遣都督馮永洛就臺斬之時年四十八簿錄其家口

後誅儼等上哀悼不視事數日追憶不已詔起復其子道盛為常侍又勅其弟士任入內省參典機密詔贈士開假黃鉞十州諸軍事左丞相太宰如故士開稟性庸鄙不關書傳發言吐論惟以諂媚自次貝河清天統以後威權轉盛富商大賈朝夕填門朝士不知立小耻者多相附會甚者為其假子與市道小人存昆季行列又有入士曾參士開值疾醫云王傷寒極重進藥無效應服黃龍湯士開難色是人云此物

甚易與至不須疑惑請為王先嘗之一舉便盡士開深感此心為之強服遂得汗病愈其傾朝廷也如此雖以左道事之者不問賢愚無不進擢而以正理干忤者亦頗能捨之士開見人將加刑戮多所營救既得免罪即命誨喻責其珍寶謂之贖命物雖有全濟皆非直道云

穆提婆本姓駱漢陽人也父超以謀叛伏誅提婆母陸令萱嘗配入掖庭後主繼祿之中令其鞠養謂之乾阿姊遂大為胡后所昵愛令萱奸

巧多機辯取媚百端宮掖之中獨擅威福天統
初奉引提婆入侍後主朝夕左右大被親狎嬉
戲醜褻無所不爲寵遇彌隆官爵不知紀極遂
至錄尚書事封城陽王令萱又佞媚穆昭儀養
之爲母是以提婆改姓穆氏及穆后立令萱號
曰太姬此即齊朝皇后母氏之位號也視第一
品班在長公主之上自武平之後令萱母子勢
傾內外矣庸劣之徒皆重跡屏氣焉自外殺生
予奪不可盡言晉州軍敗後主還鄴提婆奔投
周軍令萱自殺子孫大小皆棄市籍沒其家

高阿那肱善無人也其父市貴從高祖起義那
肱爲庫典從征討以功勤擢爲武衛將軍肱妙
於騎射便僻善事人每宴射之次大爲世祖所
愛重又諂悅和士開尤相褻狎士開每爲之言
彌見親待後主即位累遷并省尚書左僕射封
淮陰王又除并省尚書令肱才伎庸劣不涉文
史識用尤在士開之下而奸巧計數亦不逮士
開旣爲世宗所幸多令在東宮侍後主所以大

被寵遇士開死後後主謂其識度足繼士開遂致位宰輔武平四年令其錄尚書事又總知外兵及內省機密尚書郎中源師嘗諮肱云龍見當雩問師云何處龍見作何物顏色師云此是龍星見須雩祭非是真龍見肱云漢兒強知星宿其墻面如此又爲右丞相餘如故周師逼平陽後主於天池校獵晉州頻遣馳奏從旦至午驛馬三至肱云大家正作樂何急奏聞至暮使更至云平陽城已陷賊方至乃奏知明早旦即欲引軍淑妃又請更合一圍及軍赴晉州令肱率前軍先進仍惣節度諸軍後主謂肱曰戰是耶不戰是耶肱曰勿戰却守高梁橋安吐根曰一把子賊馬上刺取郎者汾河中帝意未決諸內參曰彼亦天子我亦天子彼尚能遠來我何爲守漸示弱帝曰此言是也於是漸進提婆觀戰東偏頗有退者提婆去曰大家去大家去帝以淑妃奔高梁應閑府奚長諫曰半進半退戰之常體今兵衆全整未有傷敗陛下舍此安之

御馬一動人情驚馬亂且還還安慰之武衛張常
山自後至亦曰軍尋收回甚勅正頓圍城兵亦不
動至尊宜迴不信臣言乞將內參往視帝將從
之提婆引帝肘曰此言難信帝遂北馳有軍士
告稱那肱遣臣招引西軍今故聞奏後主令侍
中斛律孝卿檢校孝卿云此人妄語還至晉那
肱腹心告肱謀反又以為妄斬之乃顛沛還鄴
侍衛逃散唯那肱及內官數十騎從行後主走
度太行後那肱以數千人投濟州關仍遣覘候
每奏周軍未至且在青州集兵未須南行及周
將軍尉遲迥至關肱遂降時人皆云肱表款周
武必仰生致齊主故不速報兵至使後主被擒
肱至長安授大將軍封公為隆州刺史誅初天
保中顯祖自晉陽還鄴陽愚僧阿禿帥於路中
大叫呼顯祖姓云阿那瓌終破你國是時茹茹
主阿那瓌在塞北強盛顯祖尤忌之所以每歲
討擊後亡齊者遂屬阿那肱云雖作肱字世人
皆稱為瓌音斯固亡秦者胡蓋懸定於窈冥

韓鳳字長鸞昌黎人也父永興青州刺史鳳少年幼稚世祖簡都督二十人送令侍衛鳳在其數後主親就衆中牽鳳手曰都督看兒來因此被識數喚共戲後主即位累遷侍中領軍惣知內省機密祖珽曾與鳳於後主前論事珽語鳳云強弓長矛無容相謝軍國謀筭何由得爭鳳荅云各出意見豈在文武優劣封昌黎郡王男寶仁尚公主在晉陽賜第一區其公主生男昌滿月駕幸鳳宅宴會盡日軍國要密無不經手與高阿那肱穆提婆共處衡軸號曰三貴損國害政日月滋甚壽陽陷沒鳳與穆提婆聞告敗握槊不輟曰他家物從他去後帝使於黎陽臨河築城戍曰急時且守此作龜茲國子更可憐君臣應和若此其弟萬歲及二子實行寶信並開府儀同寶信尚公主駕復幸其宅親戚咸蒙官賞鳳母鮮于段孝言之從母子姊也爲此偏相參附奏遣監造晉陽宮陳德信馳驛檢行見

孝言役官夫匠自營宅即語云僕射為至尊起
臺殿未訖何容先自營造鳳及穆提婆亦遣孝
言分工匠為已造宅德信還具奏聞及幸晉陽
又以官馬與他人乘騎上因此發忿與提婆並
除名亦不露其辜仍毀其宅公主離婚復被遣
向鄴吏部門參及後主晉陽走還被勅入內尋
詔復爵從後主走度河到青州并為周軍所獲
鳳於權要之中尤嫉人士崔季舒等冤酷皆鳳
所為每朝士諮事莫敢仰視動致呵叱輒言云

狗犬不可耐唯須殺却若見武職雖所養末品
亦容下之仕隋位終於隴州刺史

韓寶業盧勣又齊紹竝高祖舊左右唯門閹驅

使不被恩遇歷天保皇建之朝亦不至寵幸但
漸有職任寶業至長秋卿勣等或為中常侍
侍世祖時有曹文標鄧長顥輩亦有至儀同食
幹者唯長顥武平中任參宰相干預朝權後寶
業勣又齊紹子徵竝封王不過侵暴於後主之
朝有陳德信等數十人竝肆其奸佞敗政虐人

古今未有多授開府罕止儀同亦有加光祿大夫金章紫綬者多帶侍中中常侍此二職乃數十人又皆封王開府恒出入門禁往來園苑趨侍左右通宵累日承候顏色競進諂諛莫不發言動意多會深旨戲之賞動踰巨萬丘山之積貪吝無厭猶以波斯狗爲儀同郡君分其幹祿神獸門外有朝貴憩息之所時人號爲解卸聽諸閹或在內多日暫放歸休所乘之馬牽至神獸門階然後升騎飛鞭竟走數十爲羣馬塵

必至諸朝貴爰至唐趙韓駱皆隱聽趨避不敢爲言高祖時有蒼頭陳山堤蓋書樂劉桃枝等數十人俱驅馳便僻頗蒙恩遇天保大寧之朝漸以貴盛至武平時皆以開府封王其不及武平者則追贈王爵又有何海及子洪珎皆爲王尤爲親要洪珎弄權勢鬻獄賣官又有魏多之徒胡小兒等數十咸能舞工歌亦至儀同開府封王諸官者猶以官掖驅馳便煩左右漸因昵狎以至大官蒼頭始自家人情寄深密及於後

主則是先朝舊人以勤舊日之勞致此叨竊至於
胡小兒等眼鼻深峻一無可用非理愛好排突
朝貴尤爲人士之所疾惡其以音樂至大官者
沈過兒官至開府儀同三司長通年十四五便假
節通州刺史時又有開府薛榮宗常自云能使
鬼及周兵之逼言於後主曰臣已發遣斛律明
月將大兵在前去帝信之經古冢榮宗謂舍人
元行恭是誰冢行恭戲之曰林宗冢復問林宗
是誰行恭曰郭元貞父榮宗前奏曰臣向見郭
林宗從冢出着大帽吉莫靴插馬鞭問臣我阿
貞來不是時羣妾多皆類此

替身危亡之祚昏亂之朝小人道長君子道消

列傳第四十二

北齊書五十一



三才圖會卷之二

一

